

finem obligatur, obligatur quoque ad media, per quæ is ipse obtineri possit. Potest itaque in tali etiam materia ingenium quis suum exercere, quæ immediate quidem ac directe aliis nihil afferat utilitatis, sufficereque nonnunquam per ingenii culturam, illius inquisitione promotam, istud saltem indirecte in proximi vergere commodum, & sic mediate DEI gloriam promovere, ad quam omnes nostras meditationes, sermones & actiones, vel proxime vel remote, primario tamen ubique ac ultimato, dirigere abs Apostolo *1. Cor. X. 13. Coloss III. 17.* jubemur. Deinde, & præcipue quidem, advertendum venit, dari quæstiones bene multas, quæ in se consideratæ, ut tales, non adeo magni esse momenti videntur: quando autem relative spectantur, in relatione nimirum vel ad hypotheses & fundamenta, quibus superstructa alterutra de iis sententia; vel ad consequentias, & ea, quæ necessario ex negatione aut affirmatione illarum fluunt, omnino multum interesse agnoscitur, quomodo decendantur, postquam semel proponi cœperunt, quas nunquam propositas fuisse præstitisset. Sic quando, ut unico duntaxat exemplo hoc rei illustremus, quæstio formatur: *An filius DEI ab æterno à Patre genitus sit per actum intellectus in se ipsum reflexum?* ea in terminis spectata, siquidem modus generationis æternæ nullibi expressus deprehenditur, talis esse videtur, quæ affirmari & negari liceat, quemadmodum & eam non pauci inter Patres & Philippus Melanchthon affirmare non dubitarunt, Scholastici item de ea in utramque disputant partem, ne Calvino-Reformatos plerosque itidem affirmativam suam facientes memorem, de quibus omnibus vid. QVENSTEDIUS *Part. I. Syst. Theol. Cap. IX. Sect. II. Qu. 9. Antith.* Ast si quis cum Paulo Samosateno & Photino, quos Servetiani ut & Sociniani sequuntur, inde inferre velit, Filium esse in Patre, uti verbum in homine, quod assertum divinam Filii substantiam personalem tollit, ipsumque S. S. Trinitatis mysterium evertit: Sane non amplius affirmare istam quæstionem licebit. Ideoque cum POIRETUS *Libr. I. Oeconom. Div. Cap. 2.* eandem propugnare novissime ausus fuerat, tempestive ac optime illi resistere JÆGERUS *Exam. Theol. Nov. Controv. 7.* & FOERTSCHIIUS *Exercit. Theol. de Æterna & Temporalis Generatione Messie §. 20. ff.* Et quantum aliorum absurdorum ex illa affirmatione necessario nexu sequatur, ob oculos posuit MUSÆUS

*Disp.*